



Tir Yimyim

www.tiryimyim.in

Regd. No. RNI. NAGAAO/2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tiryimyim@aolima



tir yimyim

TAPAK 7

**Novak Djokovic-i ATP Finals
7buba kokogo**

VOL. XXI NO. 44 (ADOK 44) DIMAPUR SANGTENNÜ (TUESDAY)

YIMPOKSÜI (NOVEMBER) 21, 2023 ₹ 5.00

Manipur nung IRB ka dena Kuki-Zo nunger 2 khaset

Imphal, November 20, 2023 (Agencies): Manipur nung November 20 nü tensa tamajungba kümogo. Valley-Based Insurgent Groups (VBIGs) ajanga Kangpokpi district amakdang Indian Reserve Police personnel ka dena Kuki-Zo nunger ana khaset.

Iba lendong ya tanep 9:30 ako meta Leilon Vaiphei aser Kharan Vaiphei tsüngda atalok.

“Central Bureau of Investigation (CBI)-i iba tatalokba bushisüngdangtsüla aser tasürtem nem temeten agütsülsüla. Centre sorkari Kuki-Zo nunger kümzüka yua iba mapa inyakertem aputsüla” ta Haokip-isa ashi.

Lendong atalokba sülen CoTU-i rongdak senden ka ayonga amendang Manipur nungi balaka razüka aotsüba indang nenshia jembı.

“Manipur nung tang aliba sorkar kübok Kuki-Zo nunger lendong nungi jenbua mali anungji Union Home Ministry-i Kuki-Zo nunger amakba ya ajitetsüla aser ketdangsübareni balaka agütsüla” ta CoTU-i metedaktsü.

Tensa mejungi akumba ajanga Manipur state police-i tesem balala nungi nisung 126 puogo. Tesüiba ghonda 24 tsüngda ozüng alema inyaksangshiba atema nisungtem apu.

Manipur nung tensa majung saka azükteta lir. Security forces-i lendong ataloktsü akok ta bilemba tesemtem nung search operations aser flag marches agir.

Manipur police-i nübertem dang olulu nung mamangtsü aser taila video nungi kümdangtsü metedaktsüogo. Osang tai prokshiba jangjatsütsü asoshi Central Control Room-i rumor-free helpline 9233522822 ka lapokogo.

“Meitei telungpurtemi Kuki-Zo nunger ali nung tashiyim

mapa inyaker. Iba ya tesempatsü mapa ka lir aser Centre sorkari mapa inyaktsü ayongzüker” ta CoTU Information and Publicity Secretary Thangtinlen Haokip-isa.

“Central Bureau of Investigation (CBI)-i iba tatalokba bushisüngdangtsüla aser tasürtem nem temeten agütsülsüla. Centre sorkari Kuki-Zo nunger kümzüka yua iba mapa inyakertem aputsüla” ta Haokip-isa ashi.

Lendong atalokba sülen CoTU-i rongdak senden ka ayonga amendang Manipur nungi balaka razüka aotsüba indang nenshia jembı.

“Manipur nung tang aliba sorkar kübok Kuki-Zo nunger lendong nungi jenbua mali anungji Union Home Ministry-i Kuki-Zo nunger amakba ya ajitetsüla aser ketdangsübareni balaka agütsüla” ta CoTU-i metedaktsü.

Tensa mejungi akumba ajanga Manipur state police-i tesem balala nungi nisung 126 puogo. Tesüiba ghonda 24 tsüngda ozüng alema inyaksangshiba atema nisungtem apu.

Manipur nung tensa majung saka azükteta lir. Security forces-i lendong ataloktsü akok ta bilemba tesemtem nung search operations aser flag marches agir.

Manipur police-i nübertem dang olulu nung mamangtsü aser taila video nungi kümdangtsü metedaktsüogo. Osang tai prokshiba jangjatsütsü asoshi Central Control Room-i rumor-free helpline 9233522822 ka lapokogo.

“Meitei telungpurtemi Kuki-Zo nunger ali nung tashiyim

Rural aser Urban campaigns inyaktsü. District asem nung campaign agidang LED enokba VBSY outreach van garitem amshir.

Mokokchung district nung Ongpangkong block kübok Sutsu aser Kinunger yimtsüngtem nung Viksit Bharat Sankalp Yatra campaign agia liasü.

Tuensang district nunga Longkhim Block kübok Sangsomong aser New Sangsomong yimtsüngtem nung VBSY agi.

Iba yatra ya Prime Minister Narendra Modi-i November 15, 2023 nü Jharkhand kubo Khunti yimtsüng nungi tenzükja liasü.

Centre sorkar indang welfare schemes aser policies osang prokshitsü aser mapa 100% inyakttetsü atema iba yatra agir.

Nagaland nung district asem Dimapur, Tuensang aser Mokokchung Rural Tribal locations ta jateta lir. Iba sülen

US defence secretary Lloyd Austin-i Ukraine semdang



Cooperative societies ajanga rongsenketzung ajungkettsü: Kohima DC Nagaland nung cooperative societies 8000 shi lir



Kohima, November 20, 2023

(TYO): Industries kijai dangbo Nagaland aser linük rongsenketzung ajungkettsü makok saka wadang shai shilem agitsüla, talisa iba nung cooperative societies ajanga tongti shilem agitsü koka lir ta Kohima Deputy Commissioner, Kumar Ramnikanth-isa ashi.

Red Cross Conference Hall, Kohima nung 70 buba All India Cooperative Week tembangba sentong nung DC Kumar-isa iba tayongzükba agütsü.

“Nagaland nung industry tulu mali aser Naga nunger ya industrialist masü saka Nagaland

indang Unique Selling Product (USP) ji hospitality, tourism industry aser Agri & allied products lir. Iba ama tensa ka nung cooperative societies ajanga shilem tulu agitsü lenmang lir” ta pai metedaktsü.

“Nagaland nung cooperative societies 8000 shi lir aser iba tetezü state nung teinyakttetsübatem ano meinyaktet aliba sayur. Anungji asenoki kanga meranga inyaktsüla” ta DC Kumar-isa ashi.

“Naga nungeri tangar jilu ajia

benshir, sorkar nungi senotsü teyari angutsü atema cooperative society lapoker. Cooperative society kati koba tashi ajangzüktetsü masadangtet saka pei inyakba mapa agi peritsüsa inyaktsüla” ta paisa ashi.

“Nagaland nung mozü mamshii tsünüsənbong adoker anungji iba wadang nung Nagaland temaba jenjang akümtsü lenmang lir. Asenok alima dang sayutsü atema organic market ulutsüla aser iba nung cooperative societies-i shilem agitsü akok” ta Kumar-isa shisem.

“Nagaland nung cooperative societies kija masü saka ajak yaritepa inyaksangshitsüla. Yamaji asü nung cooperative society ajak aintsu aser mapa tuluba inyaktetsü” ta pai metedaktsü.

Asenoki kecha masü ta astüba tangatetba ya toktsütsüla aser state rongsenketzung ajungkettsü atema bilemtsüla. Bank temi cooperative societies atema lapoka aliba schemes osang prokshitsüla aser agri & allied sector-ia parnok yaritsüla ta Kohima DC Kumar-isa ashi.

“Linük ajungalen cooperative

week amonger. Centre sorkari cooperative sector nung temulung agütsür kechiyong iba ajanga linük rongsenketzung jenjang ajungkettsü ta angatetogo. Centre-i iba atema ministry tasen ka tentetogo” t Cooperative Societies (DRCS) Kohima Deputy Registrar Rokovisa Chase-ia ashi.

Nagaland nung cooperative societies atema schemes 27 lir aser department-i akokba tashi cooperative societies yaritsü renema lir ta pai ashi.

Iba sentong nung technical session agidang Executive Assistant (M&E) Food Processing Section, Department of Industries & Commerce Keren Swu-i Ministry of Food Processing Industries indang schemes & programmes; Nagaland State Cooperative Bank Sector Manager Luidi Zeliang-i banking sector kübok programmes and schemes for cooperative societies, aser Zynorique Initiative, Agri Production & Marketing Cooperative Society, Kohima Managing Director Richard Belho-i marketing indang onüktem lemsatep.

Meta Small Business Academy Certification Training agi



Dimapur, November 20, 2023

(TYO): Impulse NGO Network-i Nagaland state Partner, Bethesda Youth Welfare Centre aser Business of Association of Nagaland (BAN) denkülemi Meta Small Business Academy Certification Training ka agiogo.

Iba sentong ya DC Court Jn, Dimapur nung BAN Conference Room nung agi aser Meta haad-

i teyari agütsü.

Meta Small Business Academy training nung Meta indang applications tali angatetsü sayur. Iba sentong nung Facebook, WhatsApp aser Instagram sabangtem amshiyim sayur.

Training nung adenertemi Meta applications ajanga pei shishilembaba maparen ulushitsü angazüker. Parnoki Facebook,

WhatsApp aser IG Tools tajungba meteta akümer.

Iba training nung adenertemi Meta nungi official certificates angutsü maongka angur. Meta Small Business Academy training ya shishilembartem, entrepreneurs aser digital marketing skills tajungba akümtsü bilemba kijatem atema agir.

NSDZ küboki Niuland district aitdaktsütsü jembi



Niuland District Planning and Development Board senden November 20, 2023 nü amendang Deputy Commissioner, Niuland, Sara Jamir, NCS ajanga Board züngsemtem den jembidang tangokba noksa nung angur.

Dimapur, Yimpoksü/Nov. 20

(TYO): Niuland District Planning and Development Board (DPDB) pur November ita atema senden Hombarnü Vice Chairman, DPDB Niuland aser Deputy Commissioner, Sara Jamir leninüba kübok Deputy Commissioner, Niuland indang Conference Hall nung mena liasü.

Iba senden nung Board-i Niuland District ya Nagaland Special Development Zone (NSDZ) küboki aitdaktsütsü asoshi sorkar dangi abentsü molungtepa liasü.

Iba dak sendakba nung DC Niuland, Sara Jamir, NCS ajanga ashiba agi, iba onük ya 2014 küm benokaka NSDZ nung Niuland district ya meinok. Niuland yagi Foothill road, Showuba-Pangsha 2 Lane lenmang aser danga lenmang aikati kongshir, ta lai

ashi.

Lenmang tesendaktep aika alitsü maongka ajiteta GBs, VCs aser ali kiburtem densema lokti tentet ajunga den senden ka mena iba ontük ya jembi aser Niuland nung aliba nürburtemi Niuland ya NSDZ kübok inoktsü molungtep, ta Deputy Commissioner, Niuland, Sara Jamir-i ashi.

District nung terenlok alitsü asoshi Niuland ya NSDZ küboki aitdaktsüba tajungba asütsü, ta lai ashi.

Iba senden nungya Zeo Theatre and Art Association, Nihoto village ya society registration asütsü agizüka ayu, Aghunaqa circle kübok GMS Zutoi nungi GHS upgrade asütsü, Anato village recognition asütsü atem temaba ketcangsür dangi abentsü senden nung lemtet. ADC Niuland, Athsangla

Yimkhum-i Viksit Bharat Sankalp Yatra indang rateta ashi aser ibai scheme balala indang nübur ajunga nem metedaktsütsü aser teyari agitsüpurenü züluokdaktsütsü asoshi tenzükba National Awareness campaign ka lir, ta ashi.

Niuland district atema iba yatra ya December 20 nü tenzüktsü aser January 25, 2024 nung tembangtsü.

Iba senden nung Medical department ajanga Niuland district kübok inyaksangshiba indang PowerPoint presentation agija liasü.

Niuland district pei tetsüng nung nokdaktettsü mechiketdangsür ajungai amalitep akatsüla aser mapa ana-asm bener aliba HODs temia kasa meranga inyaktsüla, ta Sara Jamir-i ayongzük.

District Industries Centre, Mokokchung ajanga metedaktsür

Dimapur, Yimpoksü/Nov.

20 (TYO): Mokokchung district kübok Village Council Chairmen ajunga dang pei aliba tesem nung PM sangdong ka nung ashi.

Vishwakarma nungi teyari agirtem jangjatsü asoshi

nisung ka-ka shima tenüng agütsüla, ta General Manager, District Industries Centre, Mokokchung sangdong ka nung ashi.

Iba atema shimtetba nisung shiai iba mapa tekeratiba nung

inyaktsüla. Iba dak sendakba nung osang tejangjaba metettsü asoshi Mokokchung nung aliba CSC District Manager den mobile number 9366505143 ajanga tongteprateptsü akok, ta sangdong ajangasa ashi.

NLA indang COPU ajanga Hotel Japfu semdangtsü

Dimapur, Yimpoksü/Nov. 20

(TYO): MLA aser Chairman, Committee on Public Undertakings for the year 2023-2024, Imkong L. Imchen-i sangdong ka nung ashiba agi, iba

committee ajanga November 24, 2023 anüngdang 11:00 ako nung Hotel Japfu, Kohima semdanga "On-the-Spot" Verification agitsü aser iba hotel tia asadangtsü.

Anungji Committtee on Public Undertakings indang züngsem ajunga dang mapang adoka iba inyakyim nung shilem agitsü ayongzüker, ta sangdong ajanga ashi.

Tuensang nung tila-tanurtem kumzüka ayutsü atema sentong ka agi

Dimapur, Yimpoksü/Nov. 20

(TYO): District Child Protection Unit, Department of Social Welfare, Tuensang ajanga Wards and Village Child Protection and Welfare Committee indang teinyaktsü angatdaktsüba sentong ka November 18, 2023 nü Deputy Commissioner, Tuensang indang Conference Hall nung agia liasü.

Iba sentong nung Yangthribi Sangtam, DCPO Tuensang ajanga tanur arishi küm 18 nungi tekubok alirtem kumzüka ayutsü asoshi ajaki lungjemer inyaktsü ayongzüka liasü.

Juvenile Justice Board, Child Working Committee, aser SGDUs densema DCPO kübok

inyakyim balala indang pai rateta ashi.

Tanurtem kumzüka ayutsü asoshi awareness agütsütsü atema yimtsüng sasep nunga committee tentettsü kanga tongtipang lir, ta pai ashi aser tila-tanur dak sendakba ken o JJB dangi indang-indanga meyoktsüla, ta shia liasü.

Yimtsüng sasep nung tanurtem kumzüka ayutsü, talisa tsürabor maliba tanur indang ken o dak sendakba nung Village Child Committees (VCC) ajanga tongti shilem agitsüla, ta pai ashi.

Pai ward union tem danga ozüng ya pei molungba nung mamshitsü saka department

nemo sang agütsütsü ayongzüka liasü.

Arishi küm 18 tekubok aliba tanurtem ya 'accused' ka ama masü saka 'delinquents' ama züngshitsüla, ta pai ashi.

Iba sentong nung shisalen sayuri "child sexual abuse, child labour, illegal adoption, runaway children, child marriage, and substance abuse" onüktem nungi jembia liasü.

Iba sentong nung menden ya Lunang Laku, ADEO DCPO Tuensang liasü, Akumba Yimkhiung, Member CWC

Kohima nung PwD electors jangjaba sentong agitsü

Dimapur, Yimpoksü/Nov. 20 (TYO): Tang tagidak Special Summary Revision of Photo Electoral Roll, 2024 dak sendakba nung Deputy Commissioner & District Election Officer, Kohima ajanga Medical Department den lungjemer Kohima district kübok registered PwD electors (matamabensaba shilem 40 aser tema) jangjatetba sentong ka asemnü atema ayongzüksü.

Iba Camp ya Naga Hospital Authority Kohima (NHAK) nung November 22-24, 2023

anogotem anepdang 10:00 ako nungi nikongdang 2:00 ako tashi alitsü, ta DC & DEO Kohima ajanga sangdong ka nung ashi.

Iba dak sendakba nung Kohima district kübok register süa aliba PwD electors ajunga iba maongka agia tendangtsü aser maparen balala atema Medical ketdangsür dangi arutsü metedaktsür. Iba dak sendakba nung anu tali tejangjaba metetnura mobile number 8729862901 nung tongteprateptsü akok, ta sangdong ajanga ashi.

Kisamanung Food & Music festival ayongzüksü



Food and Music Festival sentong Imagi Land, Children's of Naga Heritage Village Kisama nung November 24-25, 2023 anogotem ayongzüksü aliba dak sendakba nung Tourism Department aser Imagi.Nation nungi ketdangsürtemi Hotel Ura, Kohima nung Hombarnü osangbener den jembidang tangokba noksa ka angur.

Kohima, Yimpoksü/Nov. 20

(TYO): Nagaland Tourism Department ajanga Imagi.Nation den lungjemer Hornbill Festival 2023 nüngtem nung Food and Music Festival sentong Imagi Land, Children's of Naga Heritage Village Kisama nung November 24-25, 2023 anogotem akatsü.

Iba osang ya Hombarnü Hotel Ura, Kohima nung osangbener den jembidang Deputy Director, Tourism Department, Toka E. Tuccumi aser Managing Director, Imagi.Nation, Elivinuo Selyi nati metedaktsü.

Iba sentong nung entry fee ya nisung shia sen 50 alitsü aser iba benjong nung nikongdang live music, Naga nunger chiyongtsü tabu balala angutsü aser anüngdang Kid's Carnival, art installations, book fair, lovers' lock, portable planetarium amala alitsü, ta Selyi-i ashi.

Iba sentong ya November 24 nikongdang 1:00 ako nung tenzüktsü aser aonung 10:00 ako tashi alitsü aser tananu sentong

ya anepdang 10:00 ako nung tenzüktsü aser aonung 10:00 ako tashi alitsü, ta lai ashi.

December 1 nungi 10 tashi alitsü aliba Hornbill Festival nüklä dangi arutsüsa state nung aliba tourist tem nem maongka agütsütsü mechib sentong ya ayongzüker, ta Tourism ketdangsür Tuccumi-i ashi

Kohima nung ozüng alema mapa tamajung inyaker apu



Dimapur, Yimpoksü/Nov. 20 (TYO): Kohima jila nung shishilempartem dang tashiyim amshia senotsü meshiba osang angazüka November 18, 2023 nü SDPO (North) Kohima lenisüba kübok North PS aser District Anti Extortion Team ajanga operation ka agia liasü.

Iba mapang parnoki arishi küm 28 tain NPGN/NNC (Non-Acord) züngsem S. Timothy Swu aser pa den alisang arishi küm 25 tain Nokget Konyak apu, ta osang ka ajanga ashi.

Maneni November 19, 2023 nü Khuzama Police inter-state check gate nung yimya ka amagari tem meita aoba mapang Manipur nungi adokba gari ka (Hyundai i20) nung sapon cases 50 nung heroin südi ta temolung melemteti bilemba oset tuozyk gram 600 shi nguteta liasü.

Iba dak sendakba nung arishi küm 30 tai Md. Wahidur pua lir, ta osang ajangasa ashi.

PM Modi-i Kisan Samman Nidhi kübok sen tutsuksü sangdong



November 20, 2023 nü Pali nung Ato kilonser, Narendra Modi-i Rajasthan Assembly elections atema nüboyimba sentong ka nung lokti dak teka ayiploksüba noksa nung angur.

New Delhi, Yimpoksiui/ November 20 (Agencies): Rajasthan nung assembly election agitsü mapang ana nung lia Ato kilonser, Narendra Modi-i PM-Kisan Samman Nidhi scheme kübok aluyimertem nem sen tutsuksü nangzükogo.

Rajasthan nung BJP-i manifesto nung Ujjawala beneficiaries atema LPG cylinder nung sen 450 subsidy, wheat quintal ka shia MSP sen 2,700, jalatem atema savings bond sen lakh 2, district shia ajak nung 'Mahila thana' aser police station shia nung 'mahila desk' amenoktsü aser yimi shia nung Anti Romeo Squad nangzükogo.

Hombarnü Ato kilonser Modi-ia, Rajasthan election nung BJP-i takok ngua sorkar kümra BJP sorkari PM Kisan Samman Nidhi scheme kübok

aluyimertem nem küm shia sen meyirjang teranana (12,000) agütsü, ta nangzük.

Tang iba scheme kübok aluyimertem nem küm shia sen meyirjang trokrok (6,000) agütsür.

Rajasthan kübok Hanumangarh nung lokti senden ka nung jembidang Modi-i, aluyimertem ashioktsürtem dang tai matoktsü, ta metedaktsü.

BJP-i Rajasthan nung aluyimertem dang alu nungi züngsentetba atema MSP (Minimum Support Price) agütsü nangzükba den külemi senotsü tali agütsü nangzükogo, ta pai ashi.

Modi-isa, petrol jenjang tasaktiba state ji Rajasthan lir, anungji state nung BJP-i sorkar kümra petrol totzü jenjang ajemtsü, ta nangzük.

"Rajasthan kidanger state tem nung BJP sorkar lir. Rajasthan den medemdagra item state nungbo petrol litre ka nung sen 12-13 agi dalangba.

Ajisüaka Rajasthan nung Congress sorkari petrol jenjang tasak agi ayoker. BJP-i sorkar akumba sülen petrol aser diesel jenjang reprangshtüsü, ta ni nangzük," ta pai metedaktsü.

"State nung sensakertem dang nungi auyartem dang tai matoktsü. Rajasthan nung sensakertem dang nungi auyartem jail nung puoktsü mapang ana nung lir," ta pai ashi.

Rajasthan assembly election nung BJP aser ruling Congress na kanga atongtepa tokteper. Assembly menden 200 aliba state nung November 25 nü election agitsü aser December 3 nü vote zünga election agiba osang sangdongtsü.

Delhi nung AQI kanga mejungaka school tem tanaben lapokogo

New Delhi, November 20 (Agencies): Delhi nung mopung kanga menenba ajanga school tem shibangdakja liasü; tang tashi Delhi nung Air Quality Index (AQI) kanga majung, ajisüaka Hombar nungi sorkar aser nija school tem ajak tanaben lapokogo.

Delhi sorkari, "Air Quality Index tera tajungba kümogo aser IMD/IITM-i tarutsü nung Delhi nung Air Quality tamajungba makümtsü ta asadangtetba nung ajemdaker Sub-Committee on GRAP-i parnoki tuyuba agienogo," ta metedaktsü.

Delhi-NCR nunga GRAP 4 tenokdangbatem agienogo.

Delhi nung mopung quality kanga majungba agi Commission for Air Quality Management (CAQM)-i Graded Response Action Plan 4 kübok tenokdangba benoka liasü.

Hombarnü Delhi nung AQI 310 liasü aser ibaji 'very poor' category nung lir.

Central Pollution Control Board (CPCB)-i, Hombarnep 7:00 ako meta Anand Vihar kiyong nungbo AQI 361 liasü, ta metedaktsü.



November 20, 2023 nü New Delhi nung 'US-India 2+2 Dialogue' senden nung US Ambassador to India, Eric Garcetti aser Observer Research Foundation (ORF) tatong Tir, Harsh Pant na tangokba noksa nung angur.

Andhra Pradesh High Court-i Chandrababu Naidu nem bail agütsü

New Delhi, Yimpoksiui/ November 20 (Agencies): Andhra Pradesh nung skill development department nung ochimashi ken o ka dak sendakba nung Hombarnü Andhra Pradesh High Court-i Telugu Desam Party (TDP) tongti lenir aser taoba mapang Andhra Pradesh Chief Minister, N Chandrababu Naidu nem bail agütsügo.

Osangbenertem den jembidang advocate, Sunkara Krishnamurthy-i, "Naidu-i November 28 tashi interim bail nguogo. Iba ken o nung Andhra Pradesh high court-i pa nem regular bail agütsügo," ta metedaktsü.

Court nung TDP legal team nungi lawyer, Siddarth Luthra-i Chandrababu Naidu atema ken o jembija liasü.

Tamalen kasa ken o nung Naidu pua Rajahmundry jail nung puoka liasü, ajisüaka

anogo 53 dang lirbo October 31 nü Andhra Pradesh High Court-i pa khenpiga atema chioka liasü.

State nung skill development department nung sen crore 250 dak sendakba ochimashi ken o ka nung taküm September ita tetenzüklen CID-i pa apu, iba sülen TDP pusemertemi state tesem ajaklen longkak aitba ajanga tensa raksaa liasü.

September 9, 2023 nü CID-i Nandyala nung aliba R K Function Hall nung Naidu apu.

2021 küm mezüng iba ken o nung First Information Report (FIR) ka benoka liasü.

Pa apuba mapang nungji osangbenertem den jembidang Naidu-i, "Ni ochimashi mapa kecha meinyak. CID-i jelia osang memetetdaktsü ni apur aser parnoki kükang kuli sayutsü memelunger," ta metedakja liasü.



November 20, 2023 nü Australia Deputy Prime Minister/ Defence Minister, Richard Marles aser Australia Foreign Minister, Penny Wong nati National War Memorial semdangba mapang tangokba noksa nung angur.

Union Minister Pradhan-i Odisha nung PM SHRI scheme tenzüksügo

Bhubaneswar, November 19 (Agencies): Union Education Minister, Dharmendra Pradhan-i Odisha nung Pradhan Mantri Schools for Rising India (PM SHRI) scheme tenzüksügo.

Odisha nung central school aser Jawahar Navodaya Vidyalayas 97 nungi mezüngbuba shilem nung school 63 nung iba scheme benoktsü, ta Pradhan-i metedaktsü.

Tamalen Centre sorkari states aser Union Territories ajak dang iba scheme benoka inyaktsü atema Ministry of Education kübok Department of School Education & Literacy den tezungzüktep agiang, ta tuyu lir, ajisüaka tang tashi Odisha sorkari iba tezungzüktep magi.

Union Minister-i, "State (Odisha) nung PM SHRI scheme kübok sen crore 120 dak tema indoktsü," ta metedaktsü.

2023-24 kümüksü atema Centre sorkari Odisha nung aliba Central school tem atema iba scheme kübok sen crore 50.8 lemzüktsü aser mezüngbuba shilem nung sen crore 12.7 bo agütsügo.

Pradhan-i, India sorkari

shisaliok sector nung terenlok atema küm shia state tem nem sen crore 70,000 shi agütsür aser Samagra Shiksha Abhiyan den PM Poshan schemes kübok küm shia Odisha nem sen crore 4,200 jungnüsü agütsür, ta metedaktsü.

Odisha nung sorkar school tem nung PM SHRI scheme benoka meinyakba atema mepelaba olen ka nung Union Minister-i, shisaliok aser kaketshirtem terenlok atema inyaktsü ajak külem khuret lir, anungji state sorkari iba atema ya nendaka inyaktsüla, ta ashi.

Paisa, "Tesüiba küm ka tsüngda ni chief minister (Naveen Patnaik) dang Odisha nung aliba sorkar school tem nung PM SHRI scheme benoka inyaktsü atema metedakja asemen tashi shidi zuluogo. Ni ano maneni Chief Minister dang kasaji mepishir," ta metedaktsü.

Centre sorkari PM SHRI scheme ya yaküm September 7 nü tenzüka liasü.

Amongnüsü Pradhan-i state yimtiba, Bhubaneswar nung aliba Eastern Regional Language Centre nung administrative-cum-academic aser hostel building semzükja liasü.



TIR YIMYIM

YIMOBILEM (EDITORIAL)

DIMAPUR SANGTENNÜ, YIMPOKSÜ (YIMPOKSÜ) 21, 2023

Kidangi meyiper

Oagi India len ato kilonser Narendra Modi-i anir parnok ishika dak alaka tang BJP telok nung dena alirtem ya mezüng nungi BJP nung aruba yimten lenirtem masü saka teimbaka pei pei kuli kaka bener ka khen, ka khen ta pei dena aliba yimten telok toktsür BJP wangshia alidak oa adenba purtem lir. Anungji, parnokjibo BJP telok nung tera mayang, molulem ozü ama tesem tajungba aser talemba bushia senzürtem lir, anungji temekong mapang arudang toktsür aotsü. Item molulem ozü ama yimten nung raliwalirtemji North east nung aliba asenok ama state tilatem nung teimba angutsü. Ibaji yimten nung tangatetba maliba dang masü saka rongsen nung dena sensakba ajanga sensak marem tangar tashikar sülen anishitsüsa akumba ajanga lir. Aji oda, taoba küm 20 tashi BJP teloki yimsüsüa arur tang ya parnok talulen amai yimten tensa tia indang sükdangertemi reprangteter, ibayongji joko BJP teloki aniba rong nung mena alir karbo tangar rong nung oa jenoktsü tenzükogo. Item rongnungji asen kidanger Karbi Anglong nung BJP lenir Jagatsing Engti-i anir parnok 680 tashi BJP toktsür Congress nung adenba osang ya asütsü. Parnok yagi BJP toktsür Congress teloki aruba kuli agütsüba rongnung tajungtibaji, parnok asoshi Congress telok nung adenbaji pei kidangi meyipa aruba amai lir ta ashibaji asütsü. Tamakok, timtem aser nübo kanga nüngdakba mapang nung pei telok toktsür oaka, ano kidangi meyipa arur ta shia arunungji Assam nung Congress telokia pelashishia agizükogo. Ibaji tetenzük ser Assam nung dang masü saka Nagaland nunga yimten telok balala nung dena alirtemi amir tang anogo ishika tsüngda ya pei pei telok toktsür Congress nung oa adentsü asoshi renemer dang lir amai repranger. Talisa tang election agiba state-tem Mizoram, Chhattisgarh, Madhya Pradesh, Rajasthan aser Telengana nung Congress teloki takok tuluba angu nungbo BJP nung dang masü saka tanga yimten teloktem nung dena alir yimten lenirtem aikati pei telok toktsür oa Congress nung adentsü. Congress telok ya akhidang Jawaharlal Nehru, Indira Gandhi aser Rajiv Gandhi nunger aliba mapang amato temulung lemtetsüsa lenir tajung mali saka India atema BJP melen Congress telok dak alema tanga telok mali, anungji BJP dak kodang teimla samadir yimten raliwalirtem ajak Congress nung adenshitsü. Atangji, India asoshi Congress telok ya majungbo masütsüa akok, kechiyong Congress telokiang linük nung kin aser tamangba yimsü tsütsüa telok tilatiba tashi nüngdak aser temeten meteta inyaker. Iba tangatetba nung India temzung ya yanglua lir. Ajisüaka, Congress telok dak ochi samaba agi India nung Congress dak akhüm sama aser ka khen, ka khen ta ochimashiba ken o nung tepuokdak ayutsüa aküm. Aji oda, ochimashiba temenen agi Congress wangshia aliba jenjang nungi aluba tang tashi matutet kangshir. Kasaji Nagaland nunga Congress mali kuma aoba ya ochi aser tangatetba agi anüngba ajanga asütsü. Nagaland nung yimten lenirtem rongnung, ka mesüra ana dak alaka, Congress nung medendangba yimsüsür aser lenirtembo malitsü. Aji oda, tang yimsü tesüdak purtem rongnunga tasenpurtem dak alaka tejenpurtembo Chief minister-i anir tejenpurtembo ajak amato Congress nung intetba purtem dang asütsü. Parnok asoshia Congress kiji tangar kibo masütsü, anungji center nung Congress asoshi mapang tajung arutsü amaika süra, ashiko, tangari ashiba amaji parnoka pei kidangi meyipa shilangtsüa akok. Atangji, Nagaland ama peisasa taküm melitetba state asoshi center nung yimsütsüa telok den tesendaktep junga alitsü nüngdaker, ibayongji center nung kechi teloki yimsü südir Nagaland government nung alirtema iba kasa yimten telok denji ka kumer alir. Aji tangatet dang. Ajisüaka, iba tasa kisüngji amshia yimsütsüa agi Nagaland majungtsü, kechiyong Nagaland-a la yari rongsen bushitetsü tim. Aji oda, Nagaland asoshiba center nung kechi teloki yimsü asür ta asüba dang nungbo Nagaland nung koba yimten teloki koma yimsü asür ta asübajisa tongtibangba ta bilema inyaktsüla.

OLEMSABANG

Hotel Tetezü Ya Kechidang Ajar?

~ T. Meren Paul, Lower PR Hill, Kohima

TIR YIMYIM adok November 14, 2023 page 2 nung AO HOTEL ta zülujang tulu agi züluba sign board ka sülen injong tonga yangluba ki ka jakdang car temesüng ka anena aliba tesem indang terasa yamai agüja angu."Dimapur-Kohima lenmang nung Medziphema anasa Jharnapani nung ainlen jajartem atema chiyongdak tesem mesemteta alidak tawa Ao Hotel tajung ka lapoka lir. Yangi chi tajung den shi, ango tajem aser takong nüushi (enüshi) nung asoba den süngolemba, kala dal, rosep aser lon tajung tapu balala merükmerüka awazür agütsür." Asen Ao Hotel dang masü, Sumi Rice Hotel, Lotha Rice Hotel, Manipuri Hotel ta sign board palala lemang peyong angur.

Iba sangdong angudang kum teranasemka tejaklen Tuensang lenmang nung adalokba otsü ka kü mulungi jet ta ait. Singapore nungi America nunger Water Scientist ka tenüng agi Mr. Michael R Long, WQA Rank IV, Elken Company ajanga ayongzükba program nung tzü tajung ajemtsüba indang Seminar Dimapur, Kohima, Wokha, Tuensang aser Mokokchung nung agütsüyonga senzü. Ni pa kü gari nung anir Kohima nungi apusoba Tuensang tashi kulemi jaja. Tuensang lenmang majungba agi onok Mokokchung nungi Longmisa- Alisupo ajanga Tunger junction bushia main road-i adok aser yangji Saraki tejen külen sempak ki tila ka nung table tahlang den bench la yur HOTEL ta sign board ka alibaji Scientist ba temeyong jagi tuhluktsü aser kü dang ashi "look at that sign board of HOTEL, what does it mean? I am seeing such sign board, Hotel over the road sides even in Assam" ta süngmanga asüngdang. Ni pa dang menürema, it is just a misnomer and meant to say eatery, Tea, Rice are available. Ni yamaji ashidang pa ola adoka tashi agi menü, kichiyong Hotel ta surabang chiyongtsü angudak aser mejangtsü yepden agütsüba ki dang ajar. Chiyungdak aser ayepdak ki, tesem palala tenüng yamai ajar.

Hotel- English nung Hotel tetzüji chiyungtsü aser mejangtsü yepden angudak ki dang ajar. Hotel standard telemsa aika lir, ordinary cheap Hotel category nungi Star category, 1 star nungi 7,8 star category tashi angur.

Motel- Europe aser America nungbo Highway nung gari bener ain lenmang tahlang senzürdem anenzükdk ki kong gari anena ayodak peria lir iba dangji Motel ta ajar. Motel nungji "Cabin" mejangtsü takdang tilala, chiyongtsü pei sasah alir agizüka chia ajemdak, gari nung totzü enokdak, yamaji gari bener ain senzürdem nüngdakba ajak peria angur.

Restaurant- Cheyongtsü alia achidak, nai chinüba meshitsü aser ananüri na amendaki bener arutsür.

Cafeteria- Chia ajemdak tesem kong asenoki counter nungi aseni chinüba alia auso nung enoka bener table bushia oagi nokdaker mesüra menden nung mener achidak. KFC, Macdonald amala.

Food court- Shopping mall, Shopping Arcade, Departmental store, Airport amala tesem nung chiyongtsü tapu palala ayokdak stall palala lir saka tamensü asoshiba ajak kü atema Hall tulu ka nungji table chair peria dokja lir.

Yamaji English nung tenüng palala jateta alibaji mapa agi tuyuba amah tenüng jateta lir. Asen oshi masüyonga asenoki tenüngji shidak amshitsüla. Chi kisüng ayokdak tesem dangji Rice Stall ta ajatsüla aser Süngo den amsang amtsük amlong angudak tesem dangji Tea Stall ta ajatsüla. Asen Aor tejakleni aoba kin ka ta dangari tushia reprangdang asenok nüngja tai amshiba jagi tushia masü dilua repranga mashimalu ang akumer anungji asen Aor demibo tangar amaji masü nüngja shidak amshidini ta ayongzüker.

Iba Olemsabang nung lemsaba ken-o aser shisatsü ya iba ocet züldülema ken-o ama tazüngeri angateta agitsü mepishir

Kohima Bible College-i Golden Jubilee amongtsürenemogo



Kohima Bible College pur küm 50 Golden Jubilee mong amongtsü atema KBC Campus nung jelia renemshidang tangokba noksa nung angur.

Kohima, Yimpoksuui/ November 20 (TYO): Kohima Bible College (KBC)-i November 21 nungi November 26 tashi Rüzhükhrrie Government Higher Secondary School (RGHSS), Kohima ground nung KBC küm 50 ajungba Jubilee amongtsü renemogo, ta KBC Golden Jubilee organizing committee-i sangdong ka ajanga metedaktsü.

Anogo troknü Jubilee mong ya 'Ajisüaka kodang Tanela Temeshi nenok madaki arudir nenoki tashi angutsü, aser Yirusalem nung dang masü saka Judea aser Samaria aser alima tatembang tashi nenok Kü kulitem asütsü' (Tenyartem Mapa 1:8) omen nung ajemdaker amongtsü.

Jubilee sentongtem nung o jembirtemji- Rev. Zotto Kiewhuo, Founder & Senior Pastor, Koinonia Baptist Church aser Principal Kohima Bible College (KBC); Rev. Dr. Vevozo Khamo, Vice-President Nagaland Christian Revival Church (NCRC); Rev. Dr. Putsato Naleo, Founder President, Life Transforming Ministries; John Monger, Founder & Pastor International Restoration Church Austin

KBC Principal, Rev. Zotto Kiewhuo-i, Kohima Bible College (KBC) ya Northeast India nung mezüngbuba Charismatic Bible college lir aser Nagaland nung mezüngbuba Bible College lir, ta metedaktsü.

Nagaland nung asentenshi milak jangruba mapang aser tanelal temeshii mapa inyakba mapang nung asür, Rev. Neihulie Angami-i KBC ya tenzüka liasü, ta paisa metedaktsü.

Rev Kiewhuo-i, taoba

Texas, USA; Rev. Dr. Batkupar Dunai, Cathedral of Praise Now Generation Outreach Revival Assembly Shillong, Meghalaya aser Rev. Dr. Mati Joseph, Former Registrar of Kohima Bible College (1974-1984) nunger asütsü.

Hopta piyong Jubilee mong nung KBC nung tesayurtem, taoba mapang tesayurtem, taoba mapang iba college nung zünger tang Arago balala, associations aser ministry balala nung tenzükertemia shilem agitsü.

Jubilee mapang nungsa

KBC küm 50 ajungba Golden Jubilee nüngö kaket sayatsü aser Kohima Bible College (KBC) Tir, Abei-ü Neihulie-i Salem osang abentsü.

Mongolbarnü KBC Tir, Abei-ü Neihulie-i KBC Campus nung tawa asüba Rev. David Oliver Nunn Memorial Boys Hostel semzüktsütsü.

Honibarnü anepdang 10:00

ako nungi kentenba sentong ka agitsü aser iba sentong nung Arago balala, reju balala aser nijatemi shilem agitsü.

Iba sentong ayongzükertemi tejakertem aser iba sentong nung adentsüpürtem ajak dang reception booth nung tenüng züluoktsü aser nüngö kakettem agitsü metedaktsü.

Jubilee sentong ya online sabang balala nunga 'live' sayatsü, ta Golden Jubilee ayongertemisa metedaktsü.

ANOGO ABEN TSÜNGREM DEN

Pa asen yimjung

Efesa 2:14

Yimtsüng temoatsü asenok asoshi Tasen Lai nung aiben züluba angur. Tamangertem timtem aser rishikangshi ajurua arudang, Yisui nütsüngtem dang nangzüka alibaji kanga tesütep lir: "Ni nenok den tesünep toktsür; kü tesünep Ni nenok nem agütsür" (Yn. 14:27). Pai parnok toktsüra mesüra Pa Kangki nung süra, tembartemi parnok nem tesünep koda agütsütsü ta nütsüngtemi asüngdanger alitsü. Telangzübaiji tanü azüngba nungji angur kechiaser shidakba tamangertem den Pa alir.

Theological tsütsü nungi yimjungji Khrista den sendaktepa lir. Rom 5 nung tekümtet tesayuba indang zülu aser yimjung indang jembi. "Anungji tamang agi melendaktsü nung, asen Kibuba Yisu Khrista ajanga asenoki Tsüngrem den tesünep nung pelatepdı" (Rom 5:1). Iba osang yagi Tsüngrem aser nisung tsüngda tenokdangba agienba sayur. Temenen nisung dang Tsüngrem jashiba indoktsütsü asoshi Khrista asü aser tasü nungi shia aru. Tang Tsüngremi shirnoki amanger parnok dak yimjung nung mapa inyaker. Saka yimjungji Khrista nung aser Khrista ajanga dang lir. Tsüngrem tsütsü Pa asen yimjung lir.

Pauli amangba pur taküm nung tesünep malirtem dangi tesünep O shia züluba Filipi 4:6-7 nung angur. Telangzübaiji Filipi temulung lema amanger ajak dangi özüng ka ama zülu: "Aser Tsüngrem tesünep kobai tangatetba ajak atentanger ajagi Khrista Yisu nung nenok temulung aser tebilemba ajak nüka liang". Meshitedaktsüba Khrista mapa ajanga tetsübu aser shisabulu ajak sünepstsü Khristaji Pa yimjung ta temepishir bilemtedaktsü.

Ibai Khrista yimjung bener aruba okila tetuyuba lir. Shirnok mamangba jenjang nung lir, parnok Khrista dak amangba ajanga Tsüngrem den yimjung nung lidaktsü. Tamanger shirnok shisabulu agi amokbanga lir, Khrista dena aliba bilemtedaktsüba agi Khrista den yimjung aliba agizüksü mapang tajungji agütsür.

Asenoki azüngba nung Yihuda nunger aser Bendangertem tetsüngda nung tetongdangba jara aliba ajanga yimjungji makai liasü. Yihuda nungeri Bendangertem den külemi mali, shirnok dang parnoki "azü" ta aja. Iba tejashi tia dangi Yisu aru, shiba ajak asoshi asü aser shia aru, Khrista temang ka yanglu aser Yihuda nunger aser Bendangertem ajak tendaktsü. Ajaki kasa shilem lemsatep. Khrista parnok yimjung aküm. Tang ajaki Yisu Khrista nung temulung asüba angu nung teputtep aser yimjung takoktsü aküm.

Oba, Khrista nung ni yimjung akaba asoshi Ne tenüng asanger. Ni teti iba pelaa mesüra agizüka mali asü ta nangzüker.

Joel Rosenberg-i Israel dang Gaza nung Khristantem kümzüktsü mepishi

November 20, 2023:

Evangelical America-Israel nunger kaketzüller nüngtugu, Joel C. Rosenberg-i shidi ka ajanga Isreal nunger sepaitem dang northern Gaza nung Palestine nunger Khristan 1,000 shi kümzüka West Bank-i aienhidaktsütsü mepishi.

Palestine nunger Khristantemji southern Gaza leni ora Hamas teloki parnok tepletsüa akok, ta bilema Rosenberg-i Israel sepaitem dang Khristantem kümzüktsü mepishi.

Evangelical lenir Rosenberg-i shidi ajanga, "Northern Gaza nung Palestine nunger Khristantem lendong nung lir, aser ghonda shia tensa tamajungba dang akümer," ta metedaktsü.

Palestine nunger Khristantem Hamas kiralongrartem pu-masemer, Islamic kiralongra pu-masemer

aser Israel amakba pu-masemer, ajisüaka parnok kodamasüba tensa ka nung lir, kechiyong Gaza nung parnok tejenokdak mali, ta Rosenberg-i metedaktsü.

"Parnoki yimjung nung dang liner, Laishiba sadema aginer aser pei kiyongertem meimer," ta Rosenberg-i ashi.

"Israeli Defense Forces (IDF) sepaitem mapatongji angata dang lir, atangji parnoki Palestine nunger ajak dang Gaza Strip south tsütsülen jenoktsü tuyur, kong chiyungtsü, tzü tajemtsü aser medical teyari angutsü. Ajisüaka Hamas telok tsübuba agi Khristantemibo south tsütsülen jagi mouner," ta par metedaktsü.

Rosenberg-isa, Palestine nunger Khristantem kodamasüba tensa ka nung lir, kechiyong taoba mapang ISIS teloki Khristantem anema benshiba parnoki meteta dang lir.

Khristantem south tsütsülen ora Hamas teloki parnok tepletsüa akok, ta ashi.

"Kangki nung metaba aser tasü nungi shia aruba Khristantem Nazareth nunger Yisu sülen anidakertem ya Tsüngrem dak mamangertem aser süngyanglu külemertem ama Hamas teloki züngshir. Hamas teloki Khristantem dang taochi mesayutsü," ta par metedaktsü.

Palestine nunger Khristantem, Hamas teloki parnok reshikangshiba sülen tekolak tangzüka lepsettsü

mesüra mi agi rongseta südaktsütsü ta tsübur, ta pai ashi.

Rosenberg-i par medemer ka nungi Gaza tensa osang angashiba nung ajemdaker parnok Palestine nunger Khristantem jenoka aliba Tenla kitem tanks agi longbanga lir, ta metedaktsü.

Palestine nunger Khristan 590 shi Gaza City nung aliba Catholic Arago Tenla ki ka nung jenoka lir, Khristan 350 shi Greek Orthodox Tenla kidang jenoka lir aser Khristan 53 shi Deir El Balah Tenla kidang jenoka lir, ta par metedaktsü.

"Parnok 20 shibo tepsetogo. Anogo pezü tejaklen bomb agi ano Khristan pezü yiruogo. Onoki parnok den maneni tongtepratepdar. Parnoki jena oner saka South tsütsülen mouner, kechiyong parnoki Hamas telok tsübur," ta par medemer jagi Rosenberg nem metedakja liasü.

"Tembar Joel, onoki nü dang Yisu tenüng nung parnok yaritsü mepishir; parnok Tenla kidang jenoka aliba mapang lenmang ka ajangabosa parnok yaritsü mesüra tanga tesem ka nung jenokdaktsütsü mepishir," ta par medemer jagi pa dangi mepishia liasü.

Rosenberg-isa Israel sorkar dang Gaza nung aliba Khristantemji West Bank-i odaktsütsüla ta mepishi, kechiyong West Bank nung alir Palestine nunger Khristantem parnok pelaa agizüksü.

Rosenberg-isa, "Alima tesem ajaklen Evangelical Khristantem dang item Khristantem nem teyari agütsütsü atema Khristan melungtet teloktem den inyaktsü mepishir aser Israel nunger lenirtem dang taochi sayua Gaza nung Palestine nunger Khristantem kümzüktsü mepishir," ta metedaktsü.



Joel C. Rosenberg

AO OSHI ANGAZÜKDAK:**TANÜ ANGAZÜKTSÜBA OJANG****Semtak**

(v) khen atema anenzükba (stay for a while)

* Onok kanga aniba agi len tom nung khen semtak.

Semtem

(v) ajak semdangtet (visited all)

* Arogo tenzükertemi ki ajak semtema sarasadema jaja.

OLONG PAITEP # 6620

1		2		3		4	5									
				6												7
			8													
9				10		11										
							12									
									14							
16						17										

TIPLÉN

1. Nisungjenti
4. Tsük rudenba
6. Tenzüng tesashi
8. S ___ i
9. Nisung telersa
10. Anogoshi
12. Ajanga aor
13. Tsük rizingdak
14. Tebang nungi adbkba
16. Sungdeng taterbangtiba
17. Meputep

LANGTSÜNGLEN

- ⑤ 1. Teniuk telong
-⑤ 2. Committee dang ajar
-③ 3. Yagi ki lokbker
-④ 5. Yim lemang
-④ 7. Teroatsü keter meyipa aniba
-③ 11. Kanga junga menemba
-④ 12. Majinii
-⑤ 13. Tzüma nung senzüba

OLONG PAITEP # 6619 TELANGZÜBA**TIPLÉN :**

2. Bangsemo, 6. Tiptem, 8. Jen,
9. Talila, 11. Aren, 12. Tzübo,
14. Alia, 16. Angati, 17. Odi,
18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük
14. Aitsü, 15. Tasa, 16. Aina.

NAI-A YA METETTER MA

Miss Universe 2023 nung transgender anati shilem agiogo. Tenaji Miss Portugal Marina Machete aser Miss Netherlands Rikkie Kolle na lir.

CM Pema-i East Kameng nung district secretariat lapoktsü

Itanagar, November 20, 2023 **(Agencies):** Arunachal Pradesh Chief Minister Pema Khandu-i November 20 nü East Kameng nung alirtem asoshi District Secretariat, Block A and B lapoktsüo.

Iba sentong nung Union Minister for Earth Science Kiren Rijiju, state cabinet minister Mama Natung aser MLA tem aden.

State sorkari infrastructure tajungtiba agütsüsü nangzükba ama inyaker. Seppa nung yangluba District Secretariat nung modern facilities lir aser CM Pema-isa ashi.

tejakleni aoba tamaitü lir ta CM Pema-ash.

Iba ajanga nüboritem ajangzüktsüsa mapa shitak inyaka aotsü tamang akar ta paisa ashi.

Sorkar mapa inyakertem ajanga state tejakleni anir aor. Parnoki bendanga agüja inyakba ajanga tesüba küm trok nungi tenet tashi kanga renloka aruogo, ta CM Pema-isa ashi.

District administration-i secretariat building tasenba nung tiptema mapa belena inyaktsü asoshi CM Pema-i Deputy Commissioner Sachin Rana ket nung osettsüset aitsü atema sanction order agütsü.

Maneni District Secretariat nung Block C aser D yanglutsü atema senotsü lemjüksüts ta paisa nangzük.

District Secretariat lapoktsüa sülen Seppa General Ground nung Pema Khandu, Kiren Rijiju aser MLA temi BJP indang sentong ka nung aden. Idangji parnoki Wessang nung BJP district office yanglutsü atema lung azüngtsü.

CM Pema-i party züngsemtem dang Centre aser state sorkartem indang welfare schemes aser mapatongtem indang osang prokshitsü ayongzük.

Sikkim-i anüdoklentip dak alaka tourists pelashishia jaoker

Gangtok, November 20, 2023 **(Agencies):** Sikkim state tourism department-i metedtaktsü.

“Sikkim kübok Gangtok, Namchi, Soreng, Pakyong aser Gyalshing semdangtsü akok aser benjung mapang item tesem nung tsüngsang kanga junga lir” ta parnokisa ashi.

“Sikkim nung Northern part dak alaka tourist temi arua semdangtsü akok. Teesta nung tzümettsüng timtem mali kümogo

asera tensa junga dang lir” ta state tourism department-i metedtaktsü.

Sikkim anüdoklentip tsütsü GLOF lendong nung nisung 43 asü aser 70 sama. Sikkim nung tourist season tanabuba nung iba lendong atalok.

Sikkim nung nisung lakh 2.50 tema tourism industry den sendaktepa lir aser Covid-19 wara marudang küm nung Rs 500 crores tema revenue nguteta liasü.

Manipur Governor Uikey-i Sanamahism workshop lapoktsü

Imphal, November 20, 2023 **(Agencies):** Manipur Governor Anusuiya Uikey-i November 20 nü Lainingthou Sanamahi Sanglen nung ‘rites-de-passage’ indang anogo 15 workshop lapoktsüo.

Sanamahism nung demonstration aser performance classes ya Manipur sobaliba ajungkettsü atema ayongzükä agir aser Sanamahi tamangba yimsü den sendakba külemküjatem nung temulung agütsür.

Laisa iba sentong nung shisalen sayurtem nem appreciation certificates agütsü.

Honour agütsü.

Iba mapang Governor Uikey-i Goddess Ima Leimarel Shidabi aser Supreme Lord Lainingthou Sanamahi nem tetushi agüja sarasadem.

Manipur lima kanga dang tobur tajung, sobaliba, tamangba yimsü aser inyaksangshi nung kanga takar, ta Governor Uikey-i ashi.

Laisa iba sentong nung shisalen sayurtem nem appreciation certificates agütsü.

Lainingthou Sanamahi Temple Board aser Manipur Cultural University ajanga 2022 nungi Sanamahi tamangba yimsü külemküja indang workshop ayonga agiba atema tenüngsang

agütsür ta Governor-isa metedtaktsü.

Governor Uikey-isa Meira Thougla (Evening Lighting Prayer) nung shilem agia liasü.

Iba sentong nungsa Sanamahi Temple Board vice president Vidyapati Senjam aser Manipur University of Culture Vice Chancellor Prof. P. Gunindro na aden.

ALI AYOKTSÜ LIR

2 buras available at Nihokhu (Rs 60 per sq. ft.) 500 ft from Niuland highway road.

8974869756

9612525262

Dominican Republic nung tzünglukanga sashia aru, nisung 21 asü

Santo Domingo, Yimpoksüi/ Nov. 20 (Agencies): Dominican Republic nung tzünglukanga sashia aru, nisung 21 takum samara no nisung meyirijang aika pei ki yutsür tesem balala nung prokshiba mapang tiri tzü-mopung melenshiba asoshi süki ia agitsü ayongzüka liasü.

Tesüiba ghonda 48 tsüngta tzünglukanga sashia aru, nisung 13,000 dak tema pei ki yutsür aotsüsa akum, kong power, apu aser lenmangtem raksatsü, ta Caribbean linük indang Emergency Operations Center (COE) ajanga Deobarnü ashi. Nisung 21 takum samaogo, ta COE ajanga ashi.

Iba yipru nung asürtem rongnung nisung toku Santa Domingo nung aliba highway

tunnel ka indang jara laoa parnok mena aliba gari nembunga asü, ta national police ajanga ashir.

Ali telungi tzü yimoka ai aser jara yanglua aliba metenziuka alu, ta Ministry of Public Works ajanga ashi.

Iba lendong nung bushisüngdangtsü totuyuba agütsüogo aser linük indang province 32 aliba nungi timba nung saksalema alitsü metedaktsüogo.

Social media nung video prokshiba nunga yimtong nung tzümetüng agi gari bener aoba aser ki metsüngbanga aliba nguogo.

Tir Luis Abinader-i iba ya Dominican Republic puti otsü nung tzünglukanga sashia aru, lir ta ashi.

"Tzü-mopung melenshiba nung mamangeri amangtsüla," ta Abinader-i ashi.

Tzümetüng agi kongshia aliba school tem asadangtsü aser tanurtem kumzüka ayutsü mechii Bodhbarnü tashi classes magitsü, ta pai ashi.

Linük tesem kar nung tzünglukanga sashia aru, lir ta United States embassy ajanga ashi.

Protection agency temi nisung 2,500 dak tema kumzüksüa akum aser iba yipru yagi nisung aliba ki 2,600 nung kongshi, ta COE ajanga ashi.

Deobar nikongdang tashinung tesem 45 nung communication mali, ta COE report ajanga ashir.

August ita tatemlen Tropical Storm Franklin ya Dominican Republic ajanga aodang nisung ana asü, ka sama aser nisung 3,000 shi tesem balala nungi ainshitsüa akum.

OFFICE OF THE JAPU VILLAGE COUNCIL

P.O. Mangkolemba - 798604
Dist. Mokokchung, Nagaland

SANGDONGER

Japu Yimtsüng koba Mangkolemba Sub-division kubok lir, iba yimtsüng lushi nung Shikari (12 Bore prangpong, .22, Air Gun) shibangba sangdonger. Aibelener putetra Senchi Rs. 50,000/- (Fifty thousand only) achitsü lemtetba sangdonger.

Tareptsungba
VCC
Japu Village Council

Imnangpong
Secretary
Japu Village Council

DEEDS FOR GOVERNMENT EMPLOYEE FOR CHANGE OF NAME/SURNAME AND TRIBE IN THE SERVICE BOOK

Regd. No. 23 Dates: 14.11.2023

BY THIS DEED, I, the undersigned TAKALEMLA late called TEKALEMLA (former name) employed as Graduate Teacher under Education Department do hereby:

- Wholly renounce, relinquish and abandon on the use of my former name of TEKALEMLA and in place thereof do assume from the date thereof the name of TAKALEMLA and so that I may hereby be called, known and distinguished not by my former name of TEKALEMLA but by my assigned name of TAKALEMLA.
- For the purpose of evidence such my determination, declare that I shall at all times hereby after in all records, deeds and writings and in all proceedings, dealings and transactions private as well as public and upon all occasions whatsoever use and sign the name of TAKALEMLA as my name in place of and in substitution for my former name of TEKALEMLA.
- Expressly authorizes and request all persons at all times hereafter to designate and address me by such name of TAKALEMLA.
- In witness whereof I hereunto subscribed my former and adopted name of TEKALEMLA and TAKALEMLA affixed my seal this 2nd day of October 2023.

1st Class Magistrate
Mokokchung: Nagaland

Israel-i Gaza nung Indonesian Hospital amakba aitsür

Gaza City, Yimpoksüi/Nov. 20 (Agencies): Israel nungeri Gaza nung aliba Indonesian Hospital amakba Indonesia indang Foreign Minister Retno Marsudi-i aitsü aser ibai international humanitarian laws nung aibelenba tejangga lir ta ashi.

Russia den rara nung military teyari agütsürem rongnung Washington kanga agi temba jenjang nung lir aser tang parnoki teyari agüja aliba ya ajema kümra Ukraine asoshi kanga dang takoksa tulu asütsü, kechiyong parnok asükwa tanabuba asoshi renemshiba mapang ka lir aser Russia-ia tang asendenshir tesem balala tali maka arudar.

Austin aser Secretary of State Antony Blinken nati October ita ken o ka angadangba mapang ozüng yanglurtem dang Ukraine nem maneni teyari agütsütsü asoshi mepeshia asüngdanggogo aser US defence tekolakbai ashiba agi, "asenok teyari medeni (Russia tir Vladimir) Puti-i takok angutsü."

Russia-i amakba sülen US tekolak sur Ukraine atema international teyari bushi tenzük aser yakta dang Kyiv nem teyari agütsütsü asoshi coalition ka tenteta liasü. Parnoki achaayanga linük aika nungi teyari meshitsüogo.

Ukraine pusemer temi ano Kyiv indang sepaitem nem training balala agütsüogo aser kasa mapang nung Washington aser tanga linüktemi Russia nem tenokdangba tesashi agütsüogo, kong financial institutions, technology imports aser energy exports tem densema lir.

Maneni Ukraine-US military industry conference ka taruba ita Washington nung agitsü lir. December 6 aser 7 nü agitsü aliba sentong ya Ukraine indang domestic arms production tem densema lir.

Indonesian Hospital nung shiranger nisung 700 shi aser refugee 5,000 liasü aser mozuki meketa shelter centres nung

US defence secretary Lloyd Austin-i Ukraine semdang



US sorkari ashiba agi, Republican temi anema nokdakaka linük anaprongla nem teyari agütsütsü.

2022 küm February ita nungi Russia-i Ukraine amak tenzükba sülen Austin-i tang agi tanabenbuba Ukraine semdangogo.

Russia den rara nung military teyari agütsürem rongnung Washington kanga agi temba jenjang nung lir aser tang parnoki teyari agüja aliba ya ajema kümra Ukraine asoshi kanga dang takoksa tulu asütsü, kechiyong parnok asükwa tanabuba asoshi renemshiba mapang ka lir aser Russia-ia tang asendenshir tesem balala tali maka arudar.

Austin aser Secretary of State Antony Blinken nati October ita ken o ka angadangba mapang ozüng yanglurtem dang Ukraine nem maneni teyari agütsütsü asoshi mepeshia asüngdanggogo aser US defence tekolakbai ashiba agi, "asenok teyari medeni (Russia tir Vladimir) Puti-i takok angutsü."

Russia-i amakba sülen US tekolak sur Ukraine atema international teyari bushi tenzük aser yakta dang Kyiv nem teyari agütsütsü asoshi coalition ka tenteta liasü. Parnoki achaayanga linük aika nungi teyari meshitsüogo.

Ukraine pusemer temi ano Kyiv indang sepaitem nem training balala agütsüogo aser kasa mapang nung Washington aser tanga linüktemi Russia nem tenokdangba tesashi agütsüogo, kong financial institutions, technology imports aser energy exports tem densema lir.

Maneni Ukraine-US military industry conference ka taruba ita Washington nung agitsü lir. December 6 aser 7 nü agitsü aliba sentong ya Ukraine indang domestic arms production tem densema lir.

Indonesian Hospital nung shiranger nisung 700 shi aser refugee 5,000 liasü aser mozuki meketa shelter centres nung

Kyiv, Yimpoksüi/November 20 (Agencies): United States secretary of defence-i osang kecha magütsüi Ukraine semdangogo. Pai Ukraine semdangba ya Russia den rara nung US-i maneni parnok nongita yaritsü ta maneni nenshitsü asoshi liasü.

Lloyd Austin tanü Ukraine nunger lenirtem den ajuruteptsü aser Ukraine nüjiso asoshi raraba mapang United States-i parnok maneni nongita yaritsü ta nenshitsü asoshi Ukraine-i ogo," ta Pentagon-i Hombarnü sangdong ka ajanga metedaktsü. Security dak sendakba nung tebilemtsü aliba ajanga pai Ukraine semdangtsü aliba indang osang jelia memetdaktsü.

US-i Ukraine nem security dak sendakba nung USD billion aika tenla agütsüogo aser mapang kobika agidir agiaka Kyiv maneni nongita yaritsü ta aiben shia arudar. Ajistüaka Republican party nungi ozüng yanglurtemi teyari agütsüba anema nokdakba ajanga US-i tarutsü nung Ukraine nem teyari agütsüba ya asadangshitsü nüngdaker.

Russia-i parnok amakba nokdangtsü asoshi Ukraine nem security dak sendakba nung teyari agütsütsü nangzüker aliba maneni agütsütsü ta Austin-i nenshia metedaktsüogo," ta pentagon-isa shisem.

"Russia-i nungi nüjiso

angutsü atema Ukraine raraba mapang tang aser tarutsü nunga United State-i maneni teyari agütsütsü ta tongtibang osang ka agütsütsü asoshi ni tanü idaki lir," ta Austin-i X sabang ajanga metedaktsü.

US-i teyari agüja aliba magütsüi akümtsü akok ta tetsübu nung aliba süngejmdaktsütsü atema Austin-i Ukraine semdang ama reprangteter.

Republican party nungi ozüng yanglurtemi teyari agütsütsü memulunger aser US sorkar inyaksangshi anena ataba nungi jenbotsü atema Congress-i taoba ita agizükba khen atema tenangzükteba ka nungi Ukraine anina liasü.

US-i teyari agütsüba maneni-i odar aser taoba mapang temelaba agütsü aliba teyaritem ngudar, ajisüaka Deputy Pentagon Press Secretary Sabrina Singh-i iba ita tetenzüklen ashiba agi, teyari agütsüba tajemba kümdar kechiyong onoki Ukraine nem teyari agütsüba ya asadangshitsü nüngdaker.

Ukraine nem teyari maneni agütsüba anema US nung yimden yimsüsürtemi anembadang masü saka Israel aser Hamas na rara aser Middle East nung US sepaitem taliba amakba ajanga alima kintemi Ukraine dak temulung magütsü kümogo.

Onoki power generator tilaka amshir, kong vegetable oil atsüker, koba yangji alir nisung kari parnok chiyongtsü asoshi yua aliba agütsüba atsüker, ta yangji alirtemi ashi.

Gaza nung mozuki 35 aliba nungi 21 nung service khenyongi magütsüteter aser tanüngba mozuki nung nüngdakba osettsüset peria mali.

UK nung amenoka aliba rights group, Amnesty ajanga ashiba agi, taoa ita Israel-i tayimtsü amshia Gaza nung amakdang nisung 46 tepsetba ya civilian dak indang-indanga amakba lir ta jangjaogo aser iba ya war crimes ama bushisüngdangtsüla.

Amnesty ajanga bushisüngdangba ya October 19 nü Gaza City nung aliba Saint Porphyrius church amakba aser tasüng Nuseirat refugee camp nung nisung aliba ki ka amakba indang lir.

"Item ama ozüng alema amakba ya Palestine nunger civilian tem mezüngshiba yimya lir aser Israel mitkartemi tapi agi yamai amakba ajanga Gaza nung kecha nunga nüburtem kumzüka mali," ta Amnesty director of global research, advocacy and policy, Erika Guevara-Rosas-i ashi.

"International Criminal Court nung obenanger temi dang 2021 küm lapokba international law kubok tekeraba nung war crimes bushisüngdangtsü ajungshir," ta Guevara-Rosas-i ashi.

Novak Djokovic-i ATP Finals 7buba kokogo



Yimpoksüi/November 20, 2023 (Agencies): Novak Djokovic-i ano otsü tasen ka yanglua Deobarnü ATP Finals tenetbuba kokogo. Pai Turin nung final asaya nung Jannik Sinner 6-3, 6-3 agi koka liasü.

Djokovic-i taküm Grand Slam asem koka ajak senteper Grand Slam 24 akokba aser Masters 1000 title 40 abenba sülen ATP Finals tongteta liasü.

Taküm kanga junga asayaba sülen pa hopta 400 tashi world number 1 jenjang nung alitsü aser Roger Federer-i season-ending tournament timtiba koker aliba pai ajatetogo.

Arishi küm 36 tain asayar yagi iba asayamung nung tang lanur asayartem rongnungi tejungtiba ana; Sinner aser Carlos Alcaraz kokogo aser Paris Olympics atongtsü ana nung lia pai ano maneni temaba jenjang nung asayatetsü ta

sayuogo. Pa indang career nung pai asayamung tongtibangtem rongnung Olympics nung dang takok monguteti lir.

Iba asayamung group stage nung Djokovic akokba sülen Sinner ya Italy nunger rongnungi iba asayamung akokba mezüngbuba asayar akümtsü imla liasü.

Ajisüaka Honibarnü semifinal nung Alcaraz ama arishi küm 22 tain asayar yagia Djokovic amokbanger masayatet, shiba mapang shitak nung form kanga junga küma asayaogo.

Asaya tetenzük nungi Djokovic-i asaya amokbanger asaya aser game pezübuba nung mezüngbuba maongka anguba mapang pai Sinner indang serve break asü aser pa indang serve ka danga break mesüdaktsü asaya koka liasü. Maneni tanabuba set nunga

pai asaya tenzükli Sinner indang serve break süa liasü.

Pai meüngbuba set nungi tanbuba set tasembuba game tashi nung points 14 atonga ngua liasü.

Asaya nung Sinner kanga ayonga akoktsü ama bilema liasü saka pai kanga meranga asaya aser game tenet buba nung Djokovic-i break point ana tashi ngutetaka pai aji nokdanga serve break mesüdaktsü.

Ajisüaka tatem nung pai Djokovic menokdangtet aser double fault ana menaba sülen asayamekoki liasü.

Kasa asayamung nung Rajeev Ram aser Joe Salisbury nati 6-3, 6-4 agi Marcel Granollers aser Horacio Zeballos na koka tarep asaya kokogo.

US Open champions tarep yagi iba asayamung nung asaya ponguprongla koka liasü.

Australia tour atema Pakistan team nung asayar tasen 3 shimiogo

Yimpoksüi/November 20, 2023 (Agencies): Australia den December ita Test asaya asem asayatsü aliba atema Pakistan-i Hombarnü Saim Ayub, Aamir Jamal aser Khurrum Shehzad ta asayar tasen asem shimba team nung züngoksemogo. sangdongogo.

Fast bowler Naseem Shah, yirur aliba ajanga iba asayamung nung masayatettsü ta jangja akümba sülen iba telemeteba agiogo.

Shan Masood lenisüba nung züngsem 18 agi kümveteba squad ya Australia-i aotsü aser tawa shimba chief selector Wahab Riaz-i iba asayamung atema left-arm pacer Mir Hamza-a shimogo. World Cup nung asayaba asayar teku tashi iba asayamung atema shimogo.

Pakistan team ano New Zealand nung oa T20 asaya pongu asayatsü lir, ajisüaka iba asayamung atema team tang tashi mesangdongi lir.

Asayar tasentem rongnung

shirnok WC team nung liasü.

Asayar shimeremi Test asaya atema WC quad nungi opener Fakhar Zaman, fast bowler Haris Rauf, leg spinner Usama Mir, allrounders Shadab Khan aser Iftikhar Ahmed nunger meshim.

Taoba captain aser keeper Sarfaraz Ahmed, spinner, Abrar Ahmed, spinner Noman Ali

nunger ajak June aser July ita Sri Lanka den Test asayaba mapang asayaogo aser all rounder Faheem Ashraf Test asaya tatemsa 2022 küm December ita England den asayaba mapang asayaogo.

Pakistan team ya November 23 nungi 28 tashi Rawalpindi nung training agitsü aser November 30 nü Lahore nungi apusotsü.

1st Test - Perth, 14-18 December 2023

2nd Test - Melbourne, 26-30 December 2023

3rd Test - Sydney, 3-7 January 2024.

Euro 2024 Qualifiers: Spain-i goal 3-1 agi Georgia kokogo

Yimpoksüi/November 20, idaktsü.

Iba sülen minute 10buba nung counter attack asüba mapang Georgia nunger asayar Khivcha Kvaratskhelia-i goal ka idakja kasasa aküm.

Maneni asaya tanabuba shilem nung minute 55buba nung José Gaya-i agütsüba ball ka Torres-i idakja parnok 2-1 agi tejakdang aküm.

"Pa koma yiru mejangja, ajisüaka Gavi ground toktsür aoba yimya reprangdangra pa kanga mejungi yiru alitsü akok.

Pa takaratiba nung tanepetsü angutsü imlar," ta Torres-i ashi. Brehostibarnü Cyprus goal 3-1 agi akokba asaya nung asayartem rongnungi Gavi aser Le Normand na dang De la Fuente-i tetenzük nungi asayadakja liasü.

Arishi küm 19 tain Barcelona nunger asayar ya opponent asayar ka den tsüktepba sülen temekok tachichilen kanga mejungi atsük. Iba sülen pa maneni asaya saka ball ka control astüba mapang kasa temekok yirua tuguatok.

Asaya nung Torres-i agtsüba ball ka Real Sociedad central defender Robin Le Normand-i minute pezübuba nung tongokja Spain atema mezüngbuba goal

Group A nung Spain-i point 19 nguteta parnok temaba jenjang nung lir. Kasa mapang nung tasembuba jenjang nung aliba Norway den goal 3-3 agütsü asaya tembangba sülen Scotland-i point 17 nguteta parnok tanabubajenjang nung lir.

Asaya ti nungi point ti ngutetba sülen Georgia pezübuba nung tembangogó.

Arsene Wenger India tonga aruogo



Arsene Wenger aser Kalyan Chaubey.

Yimpoksüi/November 20, 2023 (Agencies): Global Football Development, FIFA tekolakba aser nüngtugu coach Arsene Wenger-i Hombarnü Football House semdanga linük kubok tesem balala nungi football academy teshimtet kar tekolaktem den sensaksemogo.

Wenger-isa, India nung AIFF-FIFA Academy aser youth development sentongtem amenoktsü asoshi AIFF tir, Kalyan Chaubey aser Acting Secretary General Satyanarayan M na den kanga tajangziuk ngua sensaksemogo.

Wenger aser FIFA Talent Development Scheme nungi par team Bhubaneswar nung Mongolbarnü AIFF-FIFA Academy lapoktsütsü asoshi India-i arua lir. Wenger tang mezüngbuba India-i arua lir.

Wenger agizükba mapang AIFF tir-i, "Wenger host astütsü maongka ngutetba atema kanga pelar aser pa pelashishia agizüker. Football nung pa tajangshibatem ya rasa ashitsü kilemi iba linük nung football asaya renloka aotsü atema teyari agütsütsü asoshi onok kanga ajungmesor lir. Iba ya mapang tatsüka tsüngda akoktsü ta ni bilemer," ta paisa ashi.

BILEMDANGANG

"Taitsüba agi na sünga malitsüsa inyaksangshiang."